

海門縣志卷之三

李兆星左
邑人
丁鹿壽莘野

藝文志第八

著述

明

李開醯雞集

李紀陽穀遊草

張材滄浪集 希范集

海門縣志 卷之三

一

崔桐東洲詩文集十卷 經傳類義二十卷 兩漢宛雋待問稿

二十卷 提綱旁覽十卷 藝林會材二十卷 待問稿十卷

志愚錄 無卷數

張成北海遺稿

張自新詩經大指

張鳴鶴鹽政書四卷 平倭策一卷

張先登菴竹園集 郵城漫草

李軾觀海集 過蘇篇

李廷槐麟經敷講秘意

成相南雍會紀 宦遊集 讀書說 春秋彙書

姚尚賓藻林編

李嘉禾韜鉄集

張成詔西麓草堂集

彭大翼山堂肆考二百四十卷 一鶴齋集 一統志畧 明時

席珍各集 裔孫苻所其齋詩稿八卷

彭大翱銅官傲吏集 放閑堂集 皆春樓稿 春秋萃藪二十

卷

李奇逢釣鰲篇

海門縣志 卷之三

二

崔槐龍劔集

李之達閩遊草 滇遊草 麟經秘旨

王綦隆三傳會參

江一魚一夔一鵬芳洲集

盧純學江一夔同輯類林探蹟一百一十卷

王松齡巴齋集 訂正柳州文集

王梅齡語類會要十卷

柳應芳陳甫集十卷

省志作陳父集四卷

成雲龍桑榆集

崔養浩南游草

李元柱湖隱草

李玉柱來紫閣集

陳友文宋史纂

李兆星浙東紀事 東老吟 歸田日錄 捫蝨軒集 芟剩草

黃夢卿芥庵隨筆 越游草

孫訥靈素直指

易象晉易經正印 五經輯要

陶開虞正性書 詩筏八卷

海門縣志 卷之三 三

志書

明成化二十年海門縣志初稿邑人尹璽纂

嘉靖十五年海門縣志邑人崔桐纂書凡十卷

萬歷二十二年海門縣志纂略邑人張先登纂

國朝順治十三年海門縣志邑人李兆星成敏中張緒韓同纂書

凡八卷

記序

宋王安石海門興水利記 余讀豳詩以其婦子饁彼南畝田峻
至喜嗟乎豳之人帥其家人戮力以聽吏吏推其意以相民何其

至也夫喜者非自外至乃其中心固有以然也既歎其吏之能民又思其民之所以持吏則亦欲善之心出於至誠而已蓋不獨法度有以驅之也以賞罰用天下而先王之俗廢有士於此能以豳之度自為而不苟於其民豈非所謂有志者耶以余所聞吳興沈君興宗海門之政可謂有志矣既隄海七十里以除水患遂大浚渠川醜取江湖以灌義寧等數里之田方是時民之墊於海呻吟者相屬君至則寬禁緩求以集流亡少焉誘起之以就功莫不蹶蹶然奮其憊而來也由是觀之苟誠愛民而有以利之雖創殘窮敝之餘可勉而用也況於力足者乎興宗好學知方竟其學又將

海門縣志

卷之三

四

有大者焉此何足以盡君之才抑可以觀其志矣而論者或以一邑之善不足書之今天下之邑多矣其能有以遺其民而不愧於豳之吏者果多乎不多則予不欲使其無傳也

元程世昌海門遷學記 淮之東州邑瀕海者二曰海門曰崇明扁舟往來不假信宿不有江塹近若隣里然洪潮駭浪日久衝嚙故每歲必築隄以預防之余守崇明六稔矣往歲公過海門顧瞻新治完美而文廟未稱私竊自歎天子之靈遽至是耶然豈無其人必有所待焉至正十五年通州判官竇君桂榮奉省檄來臨語予曰海門吾治下邑邑學廢墜有司之務也前教諭劉璿懼殿宇

之淪沒志謀新而力不支首白邑長勸籍儒生俾協力而分任焉於是明倫堂先成僑祀先聖自春徂冬工未克集時桂榮因公奠謁於學閔然興懷乃輸己俸以倡俾邑官學師嚴督諸儒亟圖之後教諭錢允敏於從命多士亦各協力以助鳩工度材首崇殿宇趨事之勤隆寒不輟越明年春神門洎東西廡齋迄底於成聖賢像設繪塑如新卜是年閏五月四日祇奉入殿以櫺星門未立也遂勸邑長也先不花令尹張士良捐俸以成之今年春吾州商務提領李裕來攝是邑復捐金率諸從事甃甃丹墀以畢功焉若泮水橋地靈祠咸次第就緒顧經始之不易念傳守之無窮願乞一

海門縣志

卷之三

五

言以垂後余曰賢哉竇君之用心也有二難有其事者專而為之難也施之於政知所先後之尤難也故一言而群情翕然雖然學校之設豈徒誇己名而美外觀哉堂宇維新士習益與之俱新讀書窮理必思聖人所謂教者何事所謂學者何學而仁義禮智之性盡而君臣父子兄弟夫婦朋友之職求無愧於為人由一邑之善士而為一國之善士庶幾庠序不徒設上副明時崇儒重學之意而亦竇君之所望於斯邑之士也竇君曰公之言我之心也請以為記

張天永海門學記

通州東北當海口極淮之南民以魚鹽為業

宋大觀中上解試三名登辟雍居上舍司選太守教官及考官皆被腆賞其金榜皆經御筆添解十名右文養士可謂勤矣海門為縣有廖角之奇波濤之險紹興中李寶膠西戰捷盖由此以成功真風帆雲檻之區也而必建學校崇教養立師弟子員歲春秋二丁洎朔望縣長咸率儒紳行禮大成殿濟濟誦誦一循禮制豈非以文明之治不以僻壤而或遺耶自兵興學校皆廢而海門縣尤甚焉棟宇傾圯廟貌摧墜以至於贍學士田亦皆荒沒李君世衡以河南鄉試備榜第一人為縣尹覩茲圯廢深自刻以為敷政出治古之人未有不本學校而今顧不振若此非所以敦本善俗也

海門縣志

卷之三

六

於是鳩工庇材建文廟及明倫堂修祭器甃甃丹墀煥然一新且樹櫺星門以石鑿泮池而橋焉師生講肄聿嚴齋居兩廡深宏誦聲虛徐其規模大備有非子男邦君所能辦者君且深惟兵餘學弛舊制荒落剔蒐學田以膳生徒是以來游來歌者始鮮食無餘之歎蓋惟君之尹是邑也事以身教故學政修明學校克建使其教不以身而惟言是率則區區海邑地僻民朴何以知有文學耶迺相率爭記于秦郵張天永以章君績永辭不獲則為之據事直書俾邑之士更千祀之下知學校之興實始於此

明鄭開寧海門學記 我明庠序誕興聖聖相承率用是道故人

才之濟濟治化之熙熙誠曠古莫之或及也欽惟皇工嗣登寶位繼志述事禮樂聿新尤惓惓加意於學校首敕公卿薦舉中外臣僚之老於學問優於德行者授以風憲之職俾之巡行都邑提綱維以督教規黜浮華以進實學蓋欲得真材以資治道甚盛心也正統二年春監察御史廬陵彭公勛承命行學事至邑辰謁之頃環視殿蕪堂齋殆將覆墜橋泮久就湮圯乃諭有司重爲修整維時縣丞郭德毅然承諭以爲己責遂捐俸資命工掄材繕治而郭君獨先用心不憚其勞必委曲爲之規畫先是學地狹窄居業無宮會膳無所乃市民地而充廣之百爾莫不備焉始事於是年十

海門縣志

卷之三

七

月冬訖役於明年秋九月適彭公再至顧瞻左右奐然輪然大爲之喜遂欲著其修復之槩以勸於後俾永弗墜特命開寧記之夫海門之爲邑其建學亦已久矣而廟學之宏壯具備則實肇于茲焉雖然宏壯具備非徒爲往來者之所誇美所期造就樂育於英才也爲士者朝斯夕斯游焉息焉誠能感勵奮發竭乃心力充其明體適用之學以資任用庶不負乎朝廷作育之恩憲公邑侯之督勸期待也於是乎書

崔桐海門遷縣記 海門故東洲鎮置縣命名肇自顯德編戶百有二十里元至正中以江患北徙禮安境國朝改隸維揚附諸通

損里為三十有七正德中江逾逼西徙餘中境己亥颶濤溺民土
日蹙甲辰汪令有執請損里為十有四會入覲復議改邑盖地以
聞天子允厥請命下撫按時都御史王公暉御史賈公大亨奉公
惟謹掄郡倅陳坦如皋令劉一中輩協州縣相土裁議焉御史牒
羣屬曰邑不遷則民溺治無土則邑虛何地可宅何里可割經度
以俟請勿弛攸司錄若勦都御史牒羣屬曰慎迺始圖慮迺作事
厥庀幾何厥金幾何會計以俟請勿弛攸司錄若勦羣屬議曰通
州之東四十里海門之西三十里有土曰金沙南襟漕河北負阜
野東有港焉曰進鮮厥流入河環其左西有港焉曰瞿竈厥流入

河環其右左之南則利和雄鎮土山祠宇烟火鬱蔥峙若輔右之
西則狼軍五峯茂林喬木聯青列秀宛若弼宅金沙一里可以永
奠益清幹六里可以裨虛出帑金五千六百有奇可以須費籍新
哀舊可二十里撫按以議聞制曰可位址卜食畚楬甫興汪令尋
以陟任去陳郡倅攝邑篆無何張令廷器至僅期歲以改任去邑
庠教諭劉文榮攝邑篆諸賢代續董振其為先者縣治宅厥中學
宮宅厥左宏模傑構翼如煥如大規稟創而羣工未悉舉也劉令
燭至時洗薄欽黃幕在美克一乃心令乃畫屢定衢補遺庀闕諸
未集者次第就緒於縣治所益者有吏舍有犴禁有土神祠有甫

有垣於學宮所益者有啟聖祠有敬一亭有生舍有鄉賢祠名宦祠有神廚有舍秀軒縣之前則聖諭有亭申明旌善有亭陰陽醫社有學總遞有鋪後則城隍有廟養濟有院僧道有會司講武有場右則公府有館憲臺有院南則便民預備有倉駐節有亭廣通有石橋附郭有三壇議外增置者南城築樓可門可望宗伯表坊可仰可興河渠七橋貊貌祠宇咸取給贖金節議中千金歸諸郡帑莫有私也邇迺環堵相軺蔚然蔽野有衆俛俛若安故土時髦融融濯磨故習占籍者欣欣和會樂觀新政工始于乙巳訖於庚戌謂桐實茲土產能悉改邑顛末以碑事謁桐不敏姑記其謀且勞者俾百世之下享有榮懷者知所自云

海門縣志

卷之三

九

崔桐海門縣新城紀畧 聞諸故老永樂間倭夷弗靖犯我東土訖今設兵歲備以為常嘉靖甲寅夷復犯海門海門故無城塹市聚野處之民奔命無所受其毒為甚烈乙卯復圍通城攻且焚者每旬月城竟莫能克揚郡吳守聞之曰噫有城則守無城則斃城以禦亂可但已乎抑吾屬之患是獨東土也哉寇踰膠角而漂北海犯塩場而南則如皋弗城為可虞道南江而西舍舟而北犯口岸則泰興弗城為可虞風帆西下直抵沙市則瓜洲弗城為可虞況海門僻在東隅為水寇必由之所弗城將奚恃亟請於中丞鄭

公公曰是吾責也謀諸監察御史李公莫公請於天子將新四城以為久長計得允公乃恪奉德音以詔羣工而海門尤用情焉遂故吏之貪且暴者謂高郵趙判卿幹厲精敏疏薦俾令邑事謂郡史倅朝賓守貞白而才謂優也檄之俾督諸境役且躬履邑境集輿議而損益之謂城曠則費益約之可五里三分圍可九百六十八高二丈堞高五尺濠廣六丈有四門有樓有水關有營房鋪舍計費金一萬七千九百二十兩有奇以前令詭稱蕩田徵金可裨闕也祇給帑金一萬四千一百四十兩有奇餘金尚有待焉議定工舉僅期月而寇復報警時江防廉憲張公振武有方民恃無恐

令乃率民且防且作而築者鑿者猶勤勤也會諸當道以遷代行大中丞陳公監察使君吳公崔公至咸據誠協公益申前令督成為日切焉閱歲餘而工克就緒亡愆初議邑士民大悅熙熙焉賴有庇也羣問記於東洲桐桐曰昔楚圍莒而入于郟以城惡而無備也然士蒞城蒲與屈而莫之慎識者知其為寇仇之保耳夫城佐勝之具也民決勝之本也而人心之向背有幾焉苟屈其身以城之復損其生以守之非有恩澤焉以固其中吾恐胥讒之民未可以若是具厚望也是故君子之善保其民者義以藉其身仁以結其心會人和以守地險使不可勝者在我而可勝者在敵則斯

役也其吾邑千祀之金湯乎鄭公諱曉陳公諱儒李公諱如士吳公諱伯鵬崔公諱棟張公諱景賢吳公諱桂芳洎史倅皆名進士趙令卿進士陝西興平人

彭大翱呂四場築城記 淮南煮海之區為場凡有二十呂四一場實通州分署所隸而圖籍則附之海門者也南襟大江北負滄海東極扶桑西連通泰相傳為呂仙四遊之所故其名曰呂四云先是永樂初倭夷弗靖沿江上下額設大河廖角二寨以專防守而城堡之議則以承平之後兵革不試而未遑及焉嘉靖歲甲寅倭復犯順擾我中土大江南北無不受割而淮南諸場則呂四實

海門縣志

卷之三

十一

為寇衝以故其害視他場為加烈維時巡醴薊州崔公適按兩淮議以建城工請報曰可無何崔公以屆滿代去沁州張公至復申前議爰謀諸海道崇陽劉公轉運南充王公量厥攸費檄通守喻公相厥攸址而通守潼關李公通倅大石李公海倅歸安李公則皆膺簡視厥成焉於是議發官帑贖金凡四千三百兩有奇計成橫縮可四百六十三丈高可一丈五尺而女墻雉堞翼然並峙門凡四座關凡兩座四門有樓守望有鋪其工經始于丁巳春三月落成于戊午夏四月規制若未孔宏而防範鎖鑰視昔加嚴蓋屹然東南一巨鎮也是故居者為之樂其生徙者為之復其業商者

賈者為之獲其所不越再稔而民咸安堵如故若忘其為倭殘者然茲城之所係也厥功豈淺鮮也哉里中士人謂是不可無言紀其盛僉以楮墨之役屬於余余曰在昔王公設險守其國而棄險弗有者君子以無謀訾之呂四固彈丸地也然國輸所出實不貲焉則茲城之建其容已乎矧是舉也上焉有賢臺憲以總其權下焉有良有司以董其事而羣投協力罔有譎訛量工命日不愆於素則夫幾之所乘要之又非偶然焉者行將保障東偏奠茲樂土倭夷視之殆有稽首稱降而望風辟易者矣後之享有榮懷者寧不知所自也哉崔公諱棟張公諱九功劉公諱景韶王公諱遵喻

海門縣志

卷之二

十二

公諱南嶽皆名進士李守諱汝杜鄉進士李倅諱宗堯歲貢生李倅諱繡例貢生而提兵防守則宿州衛總戎張君大義首倡是議則邑庠某某輩皆與有勞焉其餘百執事悉敘姓名于左

高宗本捍海堰記 揚州東南去五百餘里入海門地界直至廖角嘴是為江海相會之處江水姑置勿論海水自廖角嘴蜿蜒亘西北直抵淮安之塩城蓋七百餘里呂四餘東餘中餘西金沙西亭石港掘港馬塘豐利楫茶角斜等場塩課司皆隸焉海水日夜摩盪土皆鹹溷煎塩則享無窮之利種藝則不宜於稼穡是以前代皆築捍海堰外以禦鹹溷內以養田苗由是場民得以安其生

唐大歷中黜陟使李承實任江南節度判官自鹽城築堰直抵海陵綿亘兩州使海潮不得浸淫五代偽唐李昇與宋開寶中泰州刺史王文祐皆嘗修築至天聖初泰州刺史張綸專圖修復時范仲淹監西溪鹽倉悉力助之謂當移捍海勢而西庶避其衝仍疊石以固其外延袤迤邐如坡形不與水爭雖有洪濤巨浪豈能奔激堰成於五年之春長一百四十三里零一百三十六丈仍置海陵兵專防罅漏民蒙其利三州皆立張范祠然人皆以范公隄名以多出仲淹之所為也後海門尹沈興宗通州守狄遵如皋尹魏甫元興化尹詹士龍亦皆修築惟呂四一場當國朝洪武二十三

海門縣志

卷之三

十三

年七月潮漲堰壞場民被水而死者三萬餘人海門縣官以聞起蘇松淮揚四府人夫又重築焉成化二年七月及七年九月兩度海潮衝激海堰復壞共缺口七十二處計一千一百八十餘丈餘東掘港等處亦有衝壞民甚苦之十三年巡鹽御史咸寧雍公泰按臨竈民舉以為言雍公慨然以為己任謀之巡撫都察院御史豐城李公裕李公亦躍然曰是必行之雍公乃備糗糧起倩沿海民夫兼各場竈丁凡四千人經始於呂四場以逮于餘東掘港等處衝缺之甚者仍委運司副使等各任其責以是歲八月刻日起

工蓋踰月而堰成

兩淮鹽法志

王昺海門學歷官題名記 歷官有題名記名實也寓美刺垂勸懲道於是乎在海門儒學國初伊昉百五十載於今矣先後蒞事者多君子也然詢之諸生則自數人而上槩乎莫知昺因懼焉夫前人之弗新繼緒者責也失今弗紀必有任其咎者少選得袁君懋而下十二人宗君琮而下二十有二人鄉貫履歷若畧若詳他
有不知者蓋闕如也既乃捐俸召工斲乎所以不泯使繼自今或可考云嘗讀元次山道州廳壁記獨稱徐履道李廙曰偏問諸公善或不及二人惡有不堪說者故為此記與刺史作戒司馬溫公之記諫院題名石也曰某也忠某也許某也直某也曲後之人得

海門縣志

卷之三

十四

歷指其名而議之可不懼哉夫君子之欲有以托諸後也其必有所以為教者否則蕃吾之迹華山之博而已余聞之嫺于詞命勤摩礪以自飭有若虞君振循循善誘以成就人才為己任有若劉君裴林君華毅然修舉廢墜見諸維揚志所載有若宋君琮吟咏情性獨立于萬象之表揭揭如也有若孫君元肅之數人者樹之風聲美矣泱泱乎蔑以加矣若夫挾詐以御物乘時以徼利肆萋菲以擠同列任意氣以督過諸生間亦有之其或然否與三人行必有我師焉擇其善者而從之其不善者而改之然則余之為茲記也寓美刺垂勸懲道於是乎在

史立模文丞相塑像記 宋丞相信國文公祀學宮舊矣西禪寺
丈室肖公像實自茲邑庠士發之蓋其言曰文山先生仕丁宋季
狀元宰相不媿科名節義文章爭光日月士則考之吾邑學宮所
為祀凡民或未知之耳夫子判崇川訪遺蹟既新厥祠像設有嚴
固也敝邑雖僻陋學士大夫承學小生後先相望將爭衡大邦光
民是程弗敢弗勉幸今假令于茲褒表前哲用勵來學信公未專
祠獨非缺典與加執事者之加惠也餘姚史子聞其言而壯之曰
卓哉諸君之用志乎夫志以定氣氣以行遠即其志而其學可觀
矣行為諸君謨之粵仲冬既望視友西禪之寮盼其中有堂巋然

海門縣志

卷之三

十五

有廡翼然詢之僧曰丈室也曰是庸詎不可以安文信公神乎於
是盡撤佛氏所謂大士龍神等土偶而奉安塑像居之蓋至是海
邦人士始識忠義之臣雖死猶生老稚遠近駢瞻快覩真若堵墻
既而某輩復請記慨惟生著功勳於當時沒膺祀典於異代非鄉
邦之英必循良之吏與其流寓而傑然者非此族不與今文公匪
生於斯宦於斯流寓於斯而茲邑祀之何居實以大忠偉節不可
泯滅凡其昔嘗轉徙踐經之處若崇川海門雖四三百樓之下人
有秉彝之心而聞其風者自不能已于企慕耳然則世之為姦賊
倖佞迷國誤君古今類有之至有肉未及寒而毛骨攸瘞其子若

孫不肯認為先塋者他人之賤惡從可喻矣孰短孰長豈俟智者而後能測之耶稽公嘗自言天地正氣流形為日星河嶽其在人曰浩然沛塞蒼冥則公之英爽安知祇滯於一隅焄蒿悽愴不變現出沒於天風海濤之衝或翩然被髮下大荒與後世懷忠抱義之徒相與捐讓周旋於寥廓之鄉也哉又惟諸君之志務其遠者大者則高山仰止景行行止歷險更危舍生取義舍文山無足師宜乎勤茲請而予樂為之成也公避元兵絕江達杭都勤王時相傳從此始神嘗留焉既綴于學而復祠以像於是此故之以也若其由揚而高郵而泰而通流離顛沛百折不磨之狀觀音山祠記

海門縣志

卷之三

十六

畧具之茲不復云

李植揚州府雙忠祠碑記

附

世有非常之功必食非常之報亦

惟遇非常之品斯能闡非常之典余嘗考古青史忠臣義士奇節瑰行何代不炳朗若丹而崇功報德之興往往闕焉未舉事實有待未嘗湮泯也夫人之有正氣猶天之有星辰地之有嶽瀆天雖晦明無常而星辰之麗天則終古不變地雖遷崩不一而嶽瀆之附地則萬穰不改世雖有代謝治亂而正氣之在人心則昭如星辰著如嶽瀆誰得揜之故節烈蘊必剖之光闡揚俟千秋之鑒兩美之合始有元感焉豈易邁哉然伸正氣於公道昭明之日易全

正氣於公道摧剝之秋難抗節烈於國運未衰之時易樹節烈於
天命既去之餘難大宋南渡之後咸淳景炎之間權奸誤國戕殺
忠良正氣消磨豪傑解體矣元兵繼進江潮不來乘輿播遷遁浮
南海社稷邱墟國事已不可為矣乃左丞相李公庭芝指揮使姜
公才提一旅之師收殘敗之卒相與抗方張之元保守維揚維揚
當江淮之衝戰亟屾守亟潰岌岌乎不啻累卵二公設奇制伏出
死力保之百折不回卒以身殉觀其當年用兵籌略不在睢陽許
張下迄今幾三四百年揚之人士鮮有憑而弔之者惟齧臺侍
御謝公正蒙題義崇祀構堂梅嶺東以興嗣歲用昭二公忠烈椅

海門縣志

卷之三

十七

歟休哉誠曠典矣按郡乘二公之保維揚也李公創廬舍以居官
民鑿運河以省車輓招亭戶以興鹽利築大城以絕敵謀募流民
以實城中辟秀夫以置幕下得士興學習射講禮賑災恤貧而朝
廷倚之為保障郡邑怙之如父母姜公則丁家洲失利而收兵入
堡三里溝再戰而設奇摧敵揚子橋轉鬪而流矢貫肩灣頭柵復
攻而元帥授首浦子市夜擣而帝轅幾返虎躍龍鬥猛氣莫當二
公之勳固已偉甚且當國勢垂盡之緒孤軍寡援之秋猶踐薄冰
以待白日袖羽毛以赴烈火翊戴彌堅不可挫易彼時招降諭降
者各再三莫不斬使厲兵背城借一誓以必死無有二心嗟乎若

二公者其可謂舍生取義殺身成仁臨大節而不可奪者矣彼自謂官銜一身睥睨不盡者獨非屢受國恩之臣而棄如敝屣每一巡城南向痛哭者豈非發憤守死之士而勢窮節變於二公不有餘愧也哉向使福州來詔時朱煥之降不行阿朮之迫不迫蓮池之執可脫疽發之慘無聞二公方將捲土重來揮赤光之西墜結朽索於將絕豈直使廣陵一片地仍為趙土已耶俯仰興懷生氣凜凜此侍御謝公所為低回馮弔不能己已而亟為請于朝飾棖桷修俎豆酬節烈于萬一云爾公奉命視鹺政肅清庶事咸理通商裕國覈吏剔蠹而猶加意課藝講學之規激揚風化之務按

海門縣志

卷之三

十八

部未久即重修董祠建坊通衢崇重正學今於二公又勸興祀典表孤忠發浩氣維萬古綱常以垂勸來禩則公之所自植立類可徵矣昔張許二公當唐之世並祀於睢張順張貴即李公統制也死之日亦並祀於襄乃姜李二公歷宋元迄皇明而至今乃始並祀於揚不朽之神於茲乃顯久缺之儀一旦斯振寧不稱曠代懿舉哉余是以表而揭之知吾揚之有二公自謝公始云時萬歷四十四年歲次丙辰仲冬吉旦巡撫遼東都察院右僉都御史郡人李植撰文裔孫雲南巨津州知州李之達湖廣安陸縣知縣李奇逢等立石

王兆雲山堂肆考序 昔元美王先生嘗謂不佞曰明興以來名卿碩士旗鼓相當炳炳麟麟其於古文章詩歌遠軼宋元直詣先秦大歷以上而雁行之豈不斐然稱盛際乎惟是類書則視前人少遜永樂大典藏在石渠天祿者海宇靡得而窺焉他如南峰手鏡牋而未成虛舟類雋隘而窘用行當與子共發岫嶼二酉之藏補此缺以成快事乎不佞唯唯而識於心亡何光生出佐邦政再掌邦禁僅成弇山別集而不遑及此矣今仲夏不佞為金閫遊金閫故稱闡闡詩書高自置而鮮推許獨推許山堂肆考甚盛不佞還棹金陵金陵薦紳先生推許是編亦如金閫也者已而知為維

海門縣志

卷之三

十九

揚彭大夫所輯大夫夙嶽嶽負才名艱於一第晚登仕版澹然圭組輒自懸車乃其篤學嗜古則自少而壯而老如一日不少衰也故能粹成是書詮綜三才彙括百氏茹芳擷馥合璧聯珍可謂閱覽大雅者矣宜見者不等以白僕而奇為藝林之鴻寶騷匠之紺珠耶自茲不獨以明文耦先秦以明詩耦漢魏盛唐又將以是編耦華林天和諸籍其於國家右文之治裨益宏矣子長云富貴而名湮滅不可勝數惟倜儻非常之士稱焉大夫不究其才於縮篆烹鮮而餘其力於濡毫吮墨或天欲以此著述成大夫之不朽乎矧大夫有子若允登者博雅好修哀然不羣是書校讐可稱精覈

視昔金根誤改大有逕庭皆天之篤施於大夫以共成其不朽者耳或謂學有根宗上智舍筏烏用是蒐羅者為此蓋黥淺之子無所逃其空空之譏託而文焉者也無論肅慎之矢防風之骨多見多聞即博文格物聖訓昭如不佞請以是為解

奏議

知縣陳誨除坍蘇困議 據本縣坍民彭銳等告稱本縣原額官民田地草場一千五百五十六頃一十七畝四分後於正統景泰天順成化等年江水坍沒宏治年間揚州知府鄧文質奏准勘實被坍田地草場一千五頃六十二畝九分該糧五千一百四十九

海門縣志

卷之三

二十

石七斗五升八合四勺馬草一千二百六十二色九斤四兩繼以正德七年嘉靖元年屢患風潮田土續坍幾盡前項糧草逼派人戶以致頗過者累貧而貧者累逃節該本縣知縣王宣裴紹宗監生王相各奏行巡撫都御史巡按御史委官重復勘報去訖未蒙明示致使民困苦深無計可甦等情到職查得本縣臨江枕海額有田地十坍八九較之他方事體委有不同雖經節年奏勘多掬原額不蒙開除致使僻壤窮民不霑聖化又况糧草包賠年久數多愈加靠累前此尚有雞豚可鬻男女可賣而今則併此皆無一遇徵收啼哭載道所不忍聞竊惟消長乘除理數自然若新開者

既合增科則坍沒者亦應除豁且本縣十分之地幸存二分尚可以二分之民代賠八分之稅然江坍日甚勢猶未已誠恐數年之後併其二分而去之又將安賠乎乞賜查議將累年勘實坍江糧草盡為蠲除後待地土復漲再行升科加補庶乎疲民得再生於垂死而聖澤益廣被於海濱矣

巡撫都御史高友機題蠲坍糧疏畧 海門縣田地三分已坍過其二人戶一分已逃亡其半見在者少坍逃者多包賠又不止於一年富者累貧貧者累逃見存人戶尚不能辦納自己糧草縱使嚴禁下弊通將坍逃錢糧減折輕則加派槩縣均賠然民已無肉

海門縣志

卷之三

二十一

可剝無歲可休而亦安能倍賠哉且土地新開者陞科坍江者除豁亦事理當然若拘不失原額定要派加坍糧未免愈驅下民逃亡恐連未坍田土亦無人佃守矣海門之縣不幾於廢乎如蒙俯念民逃地去合無將前項累經勘實遺下稅糧暫行蠲免待數年後果有新漲地土再為起科加補其現遺殘民照依前擬歸併一十四里各當本等糧差惟別有定奪乞賜早為分豁以救至急民困

戶科都給事中蕭彥覆議長策以安地方疏 臣等待罪戶科按到直隸巡按馬一本乞豁坍江田糧以保窮民以全縣治事大畧

為直隸揚州府通州海門縣濱臨江海田地坍沒縣治日蹙乞豁糧差等因奉聖旨該部知道欽此臣惟國家議事貴在利民臣等謀國期於經久海門之狀果如按臣所奏倘亦有可更張者乎昔日該縣之民以併縣奏臣以事在彼中難以遙度縣民越奏或有別情恐不謂其疲累至此極也乃今撫按會勘該縣原額一百二十里今存者什一而已原額一千五百餘頃田今存者數頃而已其戶口不當鉅邑之一村其地畝不當鉅戶之半產即使坍江田數如議豁免而一切必不可少之經制自正糧外每石出銀十兩有奇寥寥待盡之士子子待盡之民何以堪之而况江海之坍歲

海門縣志

卷之三

二十二

無紀極自設縣以來已坍之故糧再清而再豁未幾而又坍且割七里以湊之未幾而又坍萬歷九年清丈去今幾時而又坍此二百餘畝則亦何以能保其將來且設一縣則有一縣之公費有一官則有一官之事務自二千兩之外能必其無一費乎此又事理之可推者也及今不一變通而僅以豁免為恩支吾目前譬之揚湯止沸豈不暫息而無救于沸不如抽薪之愈也望梅止渴_豈不如暫潤而無救于渴不如饋漿之愈也當時臣等念此豈不至熟而事體重大談何容易故其議欲併縣則通州之民必以累己為嫌欲遷縣則江都泰州之民必以割地為辭蓋付之無可奈何而已

臣等竊謂不然通州懼累坍江之糧既豁而併之則在通州反借此百餘頃之田以供一州之用可無累也况江都也泰州也海門也自朝廷視之皆王土王民哀而益之何辭之有夫併縣大事也上策也割有餘以補不足亦事之大也中策也舍此二者而第如今日之議恐不待一二年海門之奏又至矣不然甘死而結舌是無策也卒之無地無民其何能邑當此海宇昇平之日可令一方受病委之不理乎縣民之奏臣等常參之恐不實也按臣之奏則實矣臣等又敢坐視一方受病而不以通變之說聞于上乎伏乞勅下該部查果臣言不謬仍行彼處撫按官再加詳議務求長久

海門縣志

卷之三

二十三

之策以奠江海之疲民地方幸甚臣等幸甚

邑人御史成友謙瀕海坍沒已盡疏 竊惟國朝編設郡縣選置守牧蓋為有土田可因以耕種有人民可保以生聚而後國家之額賦從茲出焉未有地既坍沒民苦竄逃而尚堪日事於誅求之無已者臣原籍南直揚州府通州清幹鄉今割屬海門縣遡考洪永初志海門縣編戶一百八十三里緣海潮衝激城郭崩坍一遷於呂四場界地再遷於餘東場界地三遷於餘中場界地止剩民戶一十四里於嘉靖二十四年割借臣通州清幹鄉六里金沙一里合成二十一里是以四遷縣址回視疇昔十亡其九餽羊僅存

已堪惋歎乃未及百年而坍沒更甚於前斗城遺子聊與蛟龍爭
此片席地然循其名仍是一縣治也惟正勉供有司莫告始則計
田起糧再則計坍加糧始則計丁當差再則計逃帶差室廬墳墓
業已漂零男女妻孥半多賣鬻欲讀書為士則糊口無資欲耕力
為麓則授田無所散四方而轉溝壑比比皆是今大海去縣城不
過里許而怒濤逼囓盜艘縱橫慘淡之狀觸目愴心竊思天下年
歲即甚凶荒穹蒼尚有豐稔之候寇氛即甚猖獗聖明自有埽盪
之時獨臣桑梓一隅既已沒為臣浸永永無可幾幸不得不哀懇
我皇上急拯垂斃之民予以苟延之路勅下撫按詳確勘議或有

海門縣志

卷之三

二十四

隣近地方可照前遷建或藉殷阜郡邑可設法幫扶或盡豁坍糧
包賠之額賦可不必取盈或永除加派胥吏之科歛可從茲悉杜
仁人君子處此當必有委曲調劑於其間者臣家在淪胥之中草
疏未畢血淚欲枯知我皇上痾瘵念切矜此愚情當不罪臣之冒
昧而立賜施行矣

李兆星海門縣宜遷宜併宜豁議 縣之初建也編戶一百八十
三里原額官民田地一千五百五十六頃有奇固饒邑也因三面
江海波濤衝削額土初坍尚存田蕩一千零五頃有奇當事者題
疏減併七十三里遷縣於禮安鄉西距通州百里然猶縣土也不

意江坍如故越數十年又將三百頃矣巡按御史江良貴題請減併三十七里再遷餘中場此正德九年事也迨至嘉靖二十三年坍日甚而民日逃止存智正五里仁和呂四二里剩田三百頃零八十四畝二分巡按御史郭希愈減併一十四里奏割通州七里田蕩二百一十一頃四十九畝三分遷縣於金沙場即今日之縣治也四遷之後本府知府吳桂芳臨縣閱視相度形勢遙計江之為患縣難久存遂起併縣通州及改縣瓜洲鎮之議申詳未果復漕撫部院唐順之議將海門移遷海安鎮請題改名海安縣附屬泰州以如皋改屬通州已令海門大户先築土城未幾唐卒于任

海門縣志

卷之三

二十五

不及終事嘉靖四十二年知縣邵化之清丈坍田一百六十頃一十五畝申詳撫按勘實奏豁至萬歷九年知縣曹鈇清丈坍田三十三頃五十六畝申詳請豁十三年本縣民成度等復以併州之疏詣闕上告巡按御史馬允登勘實覆題奉旨准行移咨撫按轉行道府時值知縣姜天麒蒞任甫兩月不願赴部改選止查坍田一十七頃八畝七分申詳請豁併州之議中止十九年知縣蔡文會續勘坍田二十二頃七十四畝二分三釐申詳請豁三十五年有坍民潘誠復以前議奔控巡按御史黃吉士批縣查報知縣王之璠申詳請併緣通州七鄉首坊里長阻撓寢議止豁坍田三十

七頃零八十畝八分雖歷經奏勘申詳坍幸蠲除而改縣併州俱成築舍自後坍没不休糧累脾納年每冊載當差田畝二百三十頃一十七畝三分三釐三毫實徵鞭銀三千七百八十有奇實漕米五百五十一石三升外加耗補閏米二百一十四石九斗一合四勺歲徵不缺民不聊生天啟四年知縣嚴爾珪崇禎十五年知縣章闇然二次清丈坍田共計八十七頃三畝八分申詳院道未蒙蠲除准將鞭糧飛灑現存田地上田每畝徵鞭稅銀七錢漕米九升三合七勺中田每畝徵鞭稅銀三錢四分漕米三合七勺中田每畝徵鞭稅銀三錢四分漕米三升三合六勺今且現存者又

海門縣志

卷之三

二十六

坍没無餘矣其存不過金沙中田四十餘頃半係鹹鹵不毛之地順治三年知縣王來慶又行清丈并今現任莊令泰宏親騎踏勘坍江外僅存田六十六頃四十四畝有零而歲輸一百四十七頃九十一畝有零之賦坍復加坍苦更加苦控籲無門嗷嗷待斃逃亡無鴻集之期現存半菘楚之寄攢眉紀畧以俟仁賢垂察擲筆不覺潛然

賦

陸進海門壘賦 嘗讀木華海賦大約言海者帝媯之所濬導涓流之所委輸故萬川歸之不知何時止而不盈尾閭泄之不知何

時已而不虛其形勢之衰延波濤之壯闊以及天吳蝸象明珠寶貝鮫人煦沫之宮神仙往來之跡莫不備具斯誠極寰宇之奇觀為詞林之學海矣獨海門壘者稽禹貢所載揚州之域有云壘夷卉服蔡沈注云在東南海中茲登狼山遙望東北隱隱一痕其即是與爰為之賦其辭曰維陽之域崇川之區吳楚綿亘斗牛分墟地惟海也厥有門焉兩石並峙五山相連周迴百里氣象萬千勢則沈雄流復浩瀚舍形內虛浮天無岸於是礪磊相望壘濱特起溯洄或設棧而拏舟遐矚或縈青而繚紫近接朝鮮遠通聶耳南聯閩越東屬交趾爰有軍壘守衛乎其中特命總戎鎮撫乎其

海門縣志

卷之三

二十七

洲則崖嶽而逶迤水則奔騰而駭浪乍合乍開非煙非瘴誠為東北之雄州洵乎淮揚之保障其側則山石礪礪以嵯峨瓊枝掩鬱以交錯望樽桑於碧津探珊瑚於丹壑至若獻師估僧時出沒於蕩雲浴日之鄉遷客騷人每悵悵於負穢臨深之地煙波杳藹錦禽藉此以栖遲濁浪排空檣烏因之而托寄戴青山畔西僧以此安禪呂四場邊仙侶於茲遊戲固已靖滄嶼之洪濤息鬱環之狂噬矣若夫朝暎浴日則萬頃蒼涼暮靄凝暉則一輪閃鑠瞻雲霧之蒼蔚蜃氣可以成樓巡海日以周遊鼉梁可以為釣詎貝闕之戶樞實金甌之鎖鑰夫積石之區有龍門兮衡山之陽有荆門兮

奚若斯門為會同之原滄海之中維蓬壘兮渤海之際有圓嶠兮
何如茲壘為邊陲之要蓋聞聖人在上則環海無波厥筐既成則
沿江可達是以挽粟而輸者可航海而行獻琛而至者亦重譯以
發皆由斯門以出入不煩向若而驚疑又豈患海童之邀路馬銜
之當蹊也哉

詩

宋文天祥漁舟 一陣風帆破碧煙兒郎驚餌理弓弦舟中自信
婁師德海上誰知魯仲連初謂悠揚真賊艦復聞欵乃是漁船人
生漂泊多磨折何日山林清畫眠 又北海口一首 滄海人間

海門縣志

卷之三

二十八

別一天只容漁父釣蒼煙而今屢起樓臺處亦有北來番漢船
又過揚子江心二首 幾日從風北海遊回從揚子大江頭臣心
一片磁鍼石不指南方不肯休 淮水淮山阻且長孤臣名姓寄
何鄉只從海上尋歸路便是當年不死方

元沈夢麟餘中場 餘中瀕海門望望斥鹵地居民多四散共享
牢盆利昔人生厲階於此置官吏權擅限程期立筴事鞭箠煙飛
朱火騰海立銀濤沸漉沙鉛淚凝椎髻瓊英碎天高歲崢嶸草白
北風厲元雲閑萬竈積雪照千里陸輸車軋軋水運舟尾尾雖云
國課集民力已彫瘁蹇驢歷亭場攬轡察地理大江繞長淮殺氣

寒鼻鳳增科苟不息禍亂恐未已吾將叩閭闔悃悃訴微意狂言
儻欺君薄命有如命水

明吳宗元吳妃塚 南北紛爭幾戰餘廣陵花柳自榮枯可憐荒
塚多湮沒瀕海誰云尚有吳 又沈公隄 捍海功成百代崇蛇
龍區藪盡耕麓當年不有臨川筆到此誰知有范公

尹惟忠游修真觀 言訪蓬萊侶輪蹄未惜遙看山開竹牖對酒
值花朝洞裏窺丹竈雲端聽玉簫仙人雙白鶴冉冉下層霄

李開游道院 晚風吹客入琳宮此日塵心一洗空石蘚坐來衣
染翠巖花雨過榻留紅誰憐白髮悲王粲欲付金丹問葛洪三島

海門縣志

卷之三

二十九

十洲何處是樓臺縹緲綵雲中

潘孜觀海 探奇瀛海一扶藜巨浸茫茫望眼迷白雲捲時風正
北黃金湧處日纔西結成蜃氣樓臺見飛倦鵬程羽翼低獨喜太
平通譯貢不聞軍壘動征鼙

崔潤捍海堰 霄漢高懸范老名築隄千古障滄瀛橫圍翠壘山
靈護倒壓銀濤海若驚已有甲兵為國計始占憂樂繫君情至今
僻壤還遺愛試聽村歌牧笛聲

陸英游觀音山 習靜依禪客披雲叩竹關藥欄時徙倚風磴一
躋攀江迴遲飛鳥天青出遠山徘徊尊酒暮聊得破愁顏

王瑛游戴青山 春風江上白雲岑貝葉曇花古佛林晴壑潮喧
僧榻近午筵鳥下法壇深魚龍盡日驚風雨桑海何年變古今欲
向陽侯問消息碧欄閒倚一沈吟

陸轍游東山觀海 芳煙瑤草滿晴沙結伴探幽石徑斜偶為尋
僧過竹院不知緣磻入桃花攜來謝眺登山屐望到張騫犯斗槎
坐久杳然忘世慮醉眠吟榻亦吾家

崔桐庚辰歸省觀江水逼縣有感 十年鄉夢水雲涯歸日殘墟
欲泛槎野哭有人悲稅役春耕無地種桑麻魚龍水濶通層漢雁
鷺煙深影斷沙心折可堪回皓首嘯歌沽酒醉漁家 又己亥又

海門縣志

卷之三

三十

七月三日颶潮丈餘海門以東人產盪盡悲感二首 今歲東隅
扼傷心北海翻萬民葬魚腹百里化龍門灑血悲親友無家問子
孫寄言當路老早為叩宸闈 潮回無綠野禾稿盡黃雲夜哭喧
新鬼孤行寂故羣耒鋤農失業雞犬野無聞皓首時東望沾巾對
落曛

崔見道秋杪游開福寺 避喧結幽侶尋僧到梵筵叩扉轉風磴
沿流入溪煙商飈素金變高林白日懸翛然展佳眺吳岫澹遙天
幸謝朝市想得遂巖石緣徘徊狎尊酒夕照窺清泉踟躕慨圓景
志意耽留連山中有明月竚立忘言旋

錢鐸游戴青山 小試登山屐翛然靜俗喧
鳥啼芳樹谷犬吠落花村墮葉驚時變
疎鐘帶雨昏遠公能愛客披衲候松門

張鳴鶴桃村 憶昔桃村草色新
牧童橫吹百年春那堪一望無
杯土化作江流腸斷聲

按舊志海門八景曰桃村牧笛曰張港漁歌曰魚骨橋梁曰貌
貌燈火曰吳陵夜月曰御夾朝煙曰廖角分潮曰三仙遺蹟桃
村一作陶村在縣西南有桃花數里此
最初之古蹟也因錄詩附存以備考

彭大翱鶴城夜發 去去片帆輕迢迢向晚行
雨收天外景風送渡頭聲
沙鳥驚起漁燈夾水明有懷渾不寐
終夜撫青萍
過舊餘中 雲暗山昏落日斜
小橋流水繞平沙故宮春色無人

海門縣志

卷之三

三十一

管惟有青青柳自花

陳完晚泊利和 望望巖居遠寥寥
暝色深魚蝦收小市煙火起
疎林接跡虛相擬含情澹不禁
隄邊獨延佇涼露濕衣襟

上招盧四 煙林高枕藉天地
足沈酣白眼看秋色青山隔晚嵐
鷗羣明海曲木葉下淮南
問訊盧生杖何時借遠探

王桂齡遷邑有感 彈丸亦麗帝王都
戶口蕭蕭孰繪圖大塊風
趨歸海若長桑浪嚙越平蕪
幸存詩禮狂瀾砥猶賴弦歌聖化敷
自此惟寧千百載願教風景逼三吳

王傲通三元山 夙抱林壑姿
每懷林壑癖維舟藉清陰
登涉有

深益雲來孤嶼青
雨散大江碧
醉吟聊自娛
胡為苦行役

姚天錫海上舊宅
春暮滯東涯
行行路轉賒
澹煙迷斷岸
飛浪捲平沙
掠水雙飛燕
沾衣幾樹花
桑田盡成海
何處問農家

李涿海上有感
去城咫尺即龍宮
萬里奔濤盡日風
只有漁燈三兩處
日隨潮汐隔江紅

邵潛送侯海門入覲
鳧舄翩翩度遠峰
回瞻馴雉隔花封
雲中輯瑞趨三殿
天上鳴珂謁九重
丞相憐才能汲引
君王問俗自雍容
楓宸剴切論時事
徭賦東南不易供